

# KERATAN AKHBAR

TARIKH : 11 SEPTEMBER 2023  
AKHBAR : BERITA HARIAN  
MUKA SURAT : 3

## 17 anjakan besar ekonomi dalam KSP RMKe-12

### 17 anjakan besar ekonomi dalam KSP RMKe-12

**Kuala Lumpur:** Pembentangan Kajian Separuh Penggal Rancangan Malaysia Ke-12 (KSP RMKe-12) oleh Perdana Menteri, Datuk Seri Anwar Ibrahim, di Dewan Rakyat pagi ini, dijangka menyenaraikan 17 anjakan besar dalam aspek ekonomi.

Menteri Ekonomi, Rafizi Ramli, berkata anjakan besar itu diperlukan bagi meletakkan semula Malaysia ke landasan yang betul bagi memastikan sasaran untuk mencapai negara berpendapatan tinggi menjelang 2026 hingga 2028 tercapai.

Mengulas lanjut katanya, dalam tempoh berbeki dua tahun lagi RMKe-12, adalah penting untuk semakan dibuat bagi

melihat sama ada perlu diwujudkan campur tangan atau sebarang perubahan terhadap dokumen itu, pasca COVID-19 dan cabaran ekonomi global.

"Kajian separuh penggal kali ini lebih bersifat semakan ke arah perancangan baharu, untuk kita selaraskan segala perancangan yang sedang berlaku dan akan berlaku dengan kerangka ekonomi Madani, dibentangkan Perdana Menteri.

"Kalau kita tidak buat anjakan besar, maka potensi ekonomi kita akan terus berhadapan dengan cabaran yang mungkin memalapkan potensi bagi mencapai negara berpendapatan tinggi.

"Jika kita terus dengan pe-

rancangan yang dibuat dahulu dan tiada anjakan besar, saya tidak yakin akan capai sasaran itu," katanya ketika ditemu bual dalam Buletin Bernama, malam kelmarin.

#### Ukur pencapaian 2021-2022

Perdana Menteri dijadual membentangkan (KSP RMKe-12) di Dewan Rakyat pada Isnin, yang mana kajian itu adalah satu lagi tindakan kerajaan dalam merealisasikan agenda Ekonomi Madani yang diusulkannya.

KSP RMKe-12 itu disediakan bagi mengukur pencapaian pada 2021-2022, serta hala tuju 2023-2025 ke arah mencapai negara mampan, sejahtera dan berpendapatan tinggi dengan

mengambil kira cabaran domestik dan trend global semasa.

Pada masa sama, Rafizi berkata, melalui semakan itu, kerajaan menyasar untuk meletakkan naratif baharu yang mempunyai daya tarikan supaya Malaysia dapat menarik minat pelabur melalui industri teknologi tinggi.

"Banyak perancangan sebelum ini berasaskan model ekonomi lama untuk tempoh 30 hingga 40 tahun lalu, negara kita membina pertumbuhan ekonomi membabitkan industri seperti perladangan, pembuatan dan perkilangan yang berintensifkan kepada buruh dan pekerja kurang mahir.

"Jadi kalau kita terus dengan

aktiviti begini yang menjadi penyumbang besar kepada ekonomi negara, sudah tentu ia tidak menarik minat pelabur sebab mereka mahu industri teknologi tinggi, bernilai tinggi dan pertumbuhan tinggi," katanya.

Dalam perkembangan lain, Rafizi berkata, melalui pelaksanaan gaji progresif dijangka April tahun depan, ia akan membabitkan pelaburan kerajaan di mana majikan akan diberi insentif untuk menaikkan gaji secara sukarela.

Beliau berkata, jika majikan mengikut garis panduan dan syarat kenaikan tangga gaji tertentu, kerajaan akan bantu menanggung sebahagian kenaikan gaji itu.